

Bosna i Hercegovina  
FEDERACIJA BOSNE I HERCEGOVINE  
UNSKO SANSKI KANTON  
KANTONALNI SUD U BIHAĆU  
Broj: 01 0 K 010772 16 K  
Bihać, 28.09.2016. godine

Pravosnažno 12.12.2016. godine.  
Presuda na osnovu sporazuma o priznanju  
krivnje.

## U IME FEDERACIJE BOSNE I HERCEGOVINE

Kantonalni sud u Bihaću u vijeću sastavljenom od sudija Arnautović Edine, kao predsjednika vijeća, Hadžić Fikrete i Cimirotić Muhameda, kao članova vijeća, sa zapisničarem Libić Sanelom, u krivičnom predmetu protiv optuženog Dervišević Sefera sin R. iz Š., općina C., kojeg brani branilac po službenoj dužnosti Mušić Husein, advokat iz Velike Kladuše, zbog krivičnog djela – Ratni zločin protiv civilnog stanovništva iz člana 173. stav 1. tačka c) u vezi sa članom 180.stav 1.Krivičnog zakona BiH, postupajući po optužnici Tužilaštva BiH Sarajevo, broj T20 0 KTRZ 0009512 14 od 30.11.2015. godine prilikom razmatranja sporazuma o priznanju krivice, u odsustvu kantonalnog tužioca, branioca i optuženog dana 28.09.2016. godine donio je i javno objavio

## P R E S U D U

Optuženi DERVIŠEVIĆ SEFER sin R. i majke P., rođene Č., rođen 17.04.1963. godine u Š., općina C., JMBG: ... nastanjen u mjestu Š. broj ..., općina C., po nacionalnosti ..., državljanin ..., pismen, po zanimanju automehaničar, oženjen, vodi se u vojnoj evidenciji u C.u, srednjeg imovnog stanja, neosuđivan

## K R I V J E

Što je:

U vrijeme rata i oružanog sukoba na teritoriji opštine C., između pripadnika 5. Korpusa Armije R BiH i Narodne odbrane Autonomne pokrajine Zapadna Bosna, u svojstvu pripadnika 517.oslobodilačke brigade (VJ 6312), 5. Korpusa A RBiH, postupao protivno pravilima međunarodnog humanitarnog prava kršeći odredbe zajedničkog člana 3 Ženevske konvencije o zaštiti civilnih lica za vrijeme rata od 12. avgusta 1949.godine, tako što je:

1. U jutarnjim satima 8. augusta 1995. godine u mjestu Š., opština C. teško fizički zlostavljao civile Č. M. i njenu kćerku K. E., rođenu Č., na način da je došao ispred kuće Č. M. i vičući i pucajući iz pištolja pozvao je da izađe, pa kada je Č. M. izišala iz kuće, nekoliko puta je snažno udario gumenom palicom po cijelom tijelu, a najviše po leđima i glavi te kada su iz kuće istrčale njena majka i dvije kćerke, istom palicom je zatim nekoliko puta snažno udario po leđima i glavi njenu kćerku E. K., rođenu Č., a zatim sjeo u auto i natjerao Č. M. i K. E. rođenu Č. da idu pored auta koje je bilo u pokretu te ih tom prilikom, vozeći se kroz selo, kroz otvoren prozor automobila, obje naizmjenično snažno udarao palicom, od kojih udaraca sa Č. M. i E. K. rođeno Č. zadobile krvne podlive po cijelom tijelu, nanoseći im na taj način snažan tjelesni bol i duševnu patnju.

2. Dana 8. augusta 1995. godine oko 11 časova, u mjestu Š., opština C., ispred policijske stanice, teško fizički zlostavljao civile T. M. i D. A. na način da je prvo T. M. gumenom palicom snažno udarao po leđima i ramenima od kojih udaraca je oštećeni padao na tlo a Dervišević Sefer, psujući mu četničku majku, hvatajući ga za vrat i gušeći ga ponovo dizao i nastavljao snažno udarati, od kojeg zlostavljanja je T. M. zadobio krvne podlive po tijelu, povraćao i izbacivao krv u urin u i stolici a zatim je D. A. više puta snažno udario

gumenom palicom po leđima i grudnom košu od kojih je udaraca oštećena zadobila oteke i modrice, nanoseći im na taj način snažan tjelesni bol i duševnu patnju.

3. Dana 8. augusta 1995. godine oko 12 časova u mjestu Š., općina C. u bivšoj trgovini A. teško fizički zlostavljao civile i to žene D. Dž., D. R., D. M. i D. M.1, na način da je ušao u trgovinu koju su navedene žene po naredbi lokalnih vlasti čistile i psujući im majku sve ih nasumično snažno udario gumenom palicom po glavi, leđima i nogama nanoseći im na taj način snažan tjelesni bol i duševnu patnju.

4. Dana 8. augusta 1995. godine u popodnevnim satima teško fizički i psihički zlostavljao civile, žene Č. Z., Č. Z.1 i Č. Š. i starca D. S. na način da je otišao do kuće Č. Z. i ispred kuće nekoliko puta je snažno udario gumenom palicom u predjelu butine i naredio joj da zajedno sa Č. Š. ide ispred njegovog auta pa je tako vozeći auto, nekoliko puta autom sustigao Č. Z. i Č. Š. i kroz otvoren prozor auta naizmjenično ih snažno udario gumenom palicom, dok nisu došli do kuće Č. Z.1, nakon čega je Č. Z.1 i D. S. izveo iz njihovih kuća, a zatim je Č. Z. i D. S. natjerao da u ruke uzmu sajlu koja je bila zavezana za prednji dio njegovog auta i naredio im da vuku auto u koje je sjedio i koje je bilo ugašeno, a Č. Z.1 i Č. Š. naredio da guraju auto, što su oni i učinili, te kada ga je D. S. zamolio da stanu jer više nije imao snage da vuče auto, Dervišević Sefer ga je gumenom palicom više puta snažno udario po glavi od čega je D. S. potekla krv iz ušiju, a potom im naredio da vuku auto sve do centra Š. što su oni i učinili te kada su stigli u centar Dervišević Sefer je ponovo gumenom palicom snažno udario više puta D. S. po svim dijelovima tijela, nanoseći im na taj način snažan tjelesni bol i duševnu patnju.

Dakle, kršeći pravila međunarodnog prava za vrijeme rata i oružanog sukoba, upotrebom sile i prijetnje namjerno nanosio civilima snažan tjelesni i duševni bol i patnju.

Čime je pod tačkama 1., 2., 3. i 4 počinio krivično djelo Ratni zločin protiv civilnog stanovništva iz člana 173. stav 1. tačka c) u vezi sa članom 180. stav 1. KZ BiH.

## O S U Đ U J E

### NA KAZNU ZATVORA U TRAJANJU OD 1 (JEDNE) GODINE.

U smislu člana 212. stav 3. ZKP-a F BiH, oštećeni Č. M., K. rođena Č. E., J. rođena Č. A., T. M., D. A., D. Dž., D. R., D. M., D. M.1, Č. Z., Č. Z.1, Č. Š. i porodica D. S. sa imovinskopравnim zahtjevom upućuju se na parnični postupak.

U smislu člana 202. stav 4. ZKP-a F BiH, optuženi se oslobađa dužnosti plaćanja troškova krivičnog postupka.

U smislu člana 200. stav 2. ZKP-a FBiH optuženi je dužan platiti paušal u iznosu od 200,00 KM, a sve u roku od 15 dana od dana pravomoćnosti ove presude pod prijetnjom prinudnog izvršenja.

## O b r a z l o ž e n j e

Tužilaštvo BiH Sarajevo, broj T20 0 KTRZ 0009512 14 od 30.11.2015. godine, podiglo je optužnicu protiv Dervišević Sefera, stavljajući mu na teret izvršenje krivičnog djela Ratni zločin protiv civilnog stanovništva iz člana 173. stav 1. tačka c) u vezi sa članom 180. stav 1. KZ BiH.

Rješenjem Suda BiH broj S1 1 K 019378 15 Kv od 17.12.2015. godine vođenje postupka u krivičnom predmetu protiv optuženog Dervišević Sefera preneseno je na mjesto nadležni Kantonalni sud u Bihacu.

Rješenjem sudije za prethodno saslušanje ovog suda broj: 01 0 K 0010772 15 Kps od 08.01.2016. godine, optužnica je u cjelosti potvrđena, a optuženi se pred sudijom za prethodno saslušanje izjasnio da nije kriv po optužnici.

U toku priprema za glavni pretres tužilac je dana, 01.09.2016. godine pod brojem T01 0 KTRZ 0024753 16 od 11.07.2016. godine u spis dostavio sporazum o priznanju krivice koji je zaključio optuženi u prisustvu svog branioca sa tužiocem. Tim sporazumom optuženi je priznao krivicu, saglasio se u pogledu imovinskopravnog zahtjeva i troškova postupka kao i u pogledu krivičnopravne sankcije. Kada je u pitanju krivičnopravna sankcija, stranke i branilac sporazumjeli su se da se optuženom za krivično djelo Ratni zločin protiv civilnog stanovništva iz člana 173. stav 1. tačka c) u vezi sa članom 180. stav 1. KZ BiH, izrekne kazna zatvora u trajanju od 1 (jedne) godine.

Prilikom razmatranja sporazuma o priznanju krivice sud je utvrdio da je optuženi sporazum zaključio dobrovoljno, svjesno i sa razumijevanjem, da je upoznat sa svim posljedicama koje proističu iz sporazuma, uključujući tu i posljedice vezane za imovinskopravni zahtjev i troškove krivičnog postupka, da optuženi razumije da se sporazumom o priznanju krivice odriče prava na suđenje, da neće moći uložiti žalbu na krivičnopravnu sankciju koja će mu se izreći, ukoliko sud prihvati sporazum, da je oštećenim data mogućnost da se pred tužiocem izjasne o imovinskopravnom zahtjevu te da je predložena krivičnopravna sankcija u skladu sa krivičnim zakonom.

Prilikom razmatranja sporazuma o priznanju krivice, dokazima predloženim od strane tužioca, izvan svake razumne sumnje utvrđeno je da su se u radnjama optuženog, na način i u vrijeme kako je to činjenično opisano u izreci presude, kako u objektivnom, tako i u subjektivnom smislu ostvarili svi bitni elementi bića krivičnog djela Ratni zločin protiv civilnog stanovništva iz člana 173. stav 1. tačka c) u vezi sa članom 180. stav 1. KZ BiH.

Krivica optuženog utvrđena je na osnovu dokaza optužbe i to: iskaza oštećenih u svojstvu svjedoka Č. M., K. E., J. A., H. N., T. M., D. A., D. Dž., D. R., Š. S., Č. Z., Č. Z.1, Č. B., Č. H., D. R., H. S., Č. J., T. H., Odluke o proglašenju ratnog stanja Službeni list RBiH, broj 7, strana 234, Proglas o konstituiranju Autonomne pokrajine Zapadna Bosna i Proglas Fikreta Abdića stanovništvu Zapadne Bosne od 22.09.1993. godine, odluke o ukidanju ratnog stanja od 28.12.1995. godine, podataka iz službene evidencije Ministarstva odbrane BiH, VOB 8 za Dervišević Sefera, ovjerene fco matičnog i jediničnog kartona za Dervišević Sefera, Izvoda iz matične knjige umrlih za D. S. i Č. Š., akta PS C. od 16.09.2015. godine, te izvoda iz kaznene evidencije za optuženog.

Oštećeni u svojim iskazima u svojstvu svjedoka saglasno su potvrdili da ih je optuženi maltretirao na način kako je to opisano u činjeničnom dijelu ove presude. Svi izvedeni dokazi se međusobno nadopunjuju i logički povezuju, tako da je činjenično stanje potpuno utvrđeno.

Utvrđeno činjenično stanje ovaj sud cijenio je i u krivičnopravnom smislu pa je našao da su se u radnjama optuženog kako u objektivnom, tako i u subjektivnom smislu ostvarili svi bitni elementi bića krivičnog djela Ratni zločin protiv civilnog stanovništva iz člana 173. stav 1. tačka c) u vezi sa članom 180. stav 1. KZ BiH.

Sud je u smislu člana 246. stav 5. ZKP-a F BiH, prihvatio sporazum o priznanju krivice, smatrajući da izrečena kazna zatvora u trajanju od 1 (jedne) godine u svemu

odgovara težini počinjenog krivičnog djela, stepenu krivične odgovornosti optuženog, njegovim ličnim prilikama i ranijem životu i da je izrečena kazna zatvora dovoljna, ali neophodno potrebna da bi se postigla svrha kažnjavanja u vidu generalne i specijalne prevencije. Prilikom razmatranja sporazuma o priznanju krivice, od olakšavajućih okolnosti sud je uzeo u obzir da je optuženi priznao krivicu, izrazivši kajanje, da je na taj način doprinio ekonomičnosti i efikasnosti postupka, njegove lične prilike.

U smislu člana 212. stav 3. ZKP-a F BiH, oštećeni Č. M., K. rođena Č. E., J. rođena Č. A., T. M., D. A., D. Dž., D. R., D. M., D. M.1, Č. Z., Č. Z.1, Č. Š. i porodica D. S. sa imovinskopravnim zahtjevom upućeni su na parnični postupak.

U smislu člana 202. stav 3. ZKP-a F BiH, sud je optuženog oslobodio dužnosti plaćanja troškova krivičnog postupka, jer po mišljenju ovog suda obavezivanjem optuženog na plaćanje troškova krivičnog postupka bila bi dovedena u pitanje njegova egzistencija i njegove porodice, jer je sam zaposlen privremeno u Italiji, a u kućnom domaćinstvu sa njim živi i razvedena kćerka i unuka, te mu je supruga nezaposlen, a u smislu člana 200. stav 2. ZKP-a F BiH optuženi je dužan platiti paušal u iznosu od 200,00 KM, a sve u roku od 15 dana od dana pravomoćnosti ove presude pod prijetnjom prinudnog izvršenja.

ZAPISNIČAR  
Libić Sanel

PREDSJEDNIK VIJEĆA  
Edina Arnautović

#### PRAVNA POUKA

Protiv ove presude dozvoljena je žalba u roku od 15 dana, Vrhovnom sudu F BiH, putem ovog suda.

Žalba nije dozvoljena zbog odluke o izrečenoj krivičnopravnoj sankciji (član 246. stav 6. tačka c) ZKP-a F BiH)